

# BAB-GAYABURBAGI-SUNMAKLEGED-GARDA

## ECLESIASTÉS GEBE-SOGLENAID Garda-nug

*Bab-Gayaburbagi-Sunmakleged-Garda.* Wegaarda, Griego-gayabali, Ekklesia'ye bileged. Hebreo-gayabardina, Qohelet'ye bileged. Wegaaya-sogbogwadi, "gayaburbagi-sunmaklegedye" sogleged, degine, "igar-itolealile, iduakwaa sunmakedye." De-ukinbali, "dule-danar-ambikuedgi-sunmakedye," soglebalid.

*Bab-Gayaburbagi-Sunmakleged-Gardagi  
weyob sunmaklenaid*

Dule-we-garda-narmaksadi, dule-Bab-gayaburbagi-sunmakedid. Israel-yargi, Jerusalén-neggweburgi David-machi-Salomón reyga megisad. We-dule, undargus-neg-dakdanikidba sunmaknaid. Ibmar-nue-durdaksadba sunmaked, bela ibmar-e-arganagwar-ebusadba sunmaked. We-dule, magar itosad, "Bab-Dummadi bonisuli dule-imaksanad, degi-inigwele, dule na dukin boniamiddamarye." Degisoggu, bela we-napneggi ibmar-guedi, wile-itolegeddibe, weligwar-itolegeddibe, gwen nabirsurye, binsarsunna ibmar-guye soged.

We-garda bergunaidgine, soged: Bab-Dummad-dobee-nanaed bur biriginedye. Bela ibmar-baramilegedi, ase bergusiye.

We-gardagine, weyob ilemakar sunmaklenaid:

1. Dule-Bab-gayaburbagi-sunmaked e-sangusadgi sunmaked (1:1–2:26).
2. We-napneggi-dulemar-gudiid (3:1–12:8).
3. Sunmaklesad-e-burba (12:9–14).  
Be itogua.

## **1. DULE-BAB-GAYABURBAGI-SUNMAKED E-SAN-GUSADGI SUNMAKED**

(1:1–2:26)

*Bela ibmar binsarsunna imakleged*

<sup>1</sup> Odurdaked-Saila David-machi, Jerusalén-neggweburgi-reyga-megisadi, weyob sogsgusad:

<sup>2</sup> “We-napneggi-ibmar-imaklegedi, binsarsunna imakleged,  
bela igarga gwen gusulid.”

<sup>3</sup> Dule we-napneggi na gandikidba-alamakdiile,  
¿ibu-nued egi amioe? Ibmar-nued amiosuli.

<sup>4</sup> Dulemar gwalulemamaid. Bamaladdi burgwemamaid.

Ar napnegdi amba gannar naid.

<sup>5</sup> Dad-ibeler nakwiardaed, argwatedabalid.

Na-bia-nakwiardaedse gannar gwae-gwae naddabalid, gannar nakwidabaligar.

<sup>6</sup> Burwa-goledi, dad-nakwed-argan-nuedsik gol-lardaed,  
geb sorbali, dad-nakwed-argan-sapiledsik aibiliddaed.

Deyobi, burwa-goledi, gwen bogigusuli,  
gannar-gannar bipirmakdiguad.

<sup>7</sup> Bela diwarmar demarse nomaid,

- degi-inigwele, demardi gwen engudasulid.  
 Diwarmar na bia gwalulemai, ase gannar  
     aibirsibalid,  
     adi, agi gannar nodagegar.
- <sup>8</sup> Bela we-ibmargi-sunmaklegedi, budar-itoleged  
     uked,  
     gwen egi bar sunmaklebidasulid.  
 Ibya, ibmar-dakedi gwen gegsusulid,  
     uaya, ibmar-itogedi gwen gegsusulid.
- <sup>9</sup> Bato ibmar-gusadi, gannar gunonibaloed.  
 Bato ibmar-imaklesadi, gannar imaklenoni-  
     baloed.  
 We-napneggine, ibmar-gwapid sated.
- <sup>10</sup> Dule-gwensak, sokardibe:  
     “Be dakena, wedi ibmar-gwapidid.”  
 Ar we-ibmardi, bato gusgu gudiguad,  
     anmar-idu-gudigusmalad-abargi                  bato  
     gudiguad.
- <sup>11</sup> Ibmar-epenne-gusmaladi, bela ielesad.  
 Dule-yoedse-gwalulemaloedi, bela ibmar-  
     yoedse-guoedi, iemarmogoed.

### *Dule-Sunmakedi, e-san-gusadgi sunmaked*

- <sup>12</sup> Ani, an emar-odurdakedid, an Israel-yargi,  
 Jerusalén-neggweburgi reyga mai gusad.
- <sup>13</sup> An nue-binsaed-nikadba bela we-napneggi-  
 ibmar-imakleged-e-burba-baraminai, degi, egi  
 nergunai an gusad. Bab-Dummad dulemarga  
 we-arbaed-dummad uksad, adi, egi arbadii  
 gumalagar.        <sup>14</sup> Bela we-napneggi ibmar-  
     imaklegedi, an daksad.     Bela a-ibmarmar  
     binsarsunna imakleged,     gwage-nunmaked  
     ukbalid.

<sup>15</sup> Ibmar-doperegwadi, geg bar gannar innikii  
gued.

Ibmar-satedi, geg ebisleged.

<sup>16</sup> An binsadii gualid: “Emide, an wegi dule-nugnikadga gunonikid. Jerusalén-neggweburgi an-idudummagan-megismaladba an bur nue-binsaednikaa gued. Anyobi, dule-baid bela-bela nuebinsaed-nikaa, bela ibmar-wisi megdisulid.

<sup>17</sup> ”An ulubgi bela-bela wisgubigualid, nuebinsaed-nikaguedi, wede ibiobarleye. Deginbali, an magar-itobiguarbalid, binsaedsuli-ibmarimaklegedi, wede ibiobarlebarye, degi, yogasaarsunmaklegedi, ibiobarlebarye.

”Geb an wisgunonikid, amba we-ibmarsebakale, gwage-nunmaked ukbalid.

<sup>18</sup> Napiragwa, ar bela-bela nue-binsaednikaguedi, bur bule bonigan ukbalid.

Ar dule bur bule ibmar-wisguedi, bur bule naibid itobalid.”

## 2

### *Ibmar-isgana-imaklegedgi-yeer-itolegedi, ibnuedsulid*

<sup>1</sup> An-gwagegegi an sogsa gusad: “Emigindi, ibmargalagwensuli-imakedgi-yeer-itolegedi, an imakdii guoye, an nue-yeer-itodii gubaloye.” Ar amba deyob gudiguedi, binsarsunna imaklebalid.

<sup>2</sup> Alledi, binsa goelleged an daked. Ibmar-galagwensuli-imakedgi-yeer-itogedi, ¿ibiga gue? Ibharga gusuli.

<sup>3</sup> Geb an wisgubigualid, vino-gobedgi bule an magar neg-itodii guodibe, degi, binsaed-satedyobi

galagwensuli ibmar-imakdii guodibe. Adi, an wisguega, dule we-napneggi sikwas-dula-gudiguedgi, na e-ibmar-imakdiidgi ibi-nued amie.

<sup>4</sup> An we-ibmar-dummagan imaksad: Negmar an sobsad, uva-nainu-dummagan an nasiksabalid. <sup>5</sup> An-nainugine, bukidar ibmar-gullemalad an digsad, dutumar an digsabalid. Sapi-san-nabir-gullemalad akar-akar an digsabalid. <sup>6</sup> Amar-o gegala, dii-sabogega yaa-dummagan an akwisbalid.

<sup>7</sup> An bukidar mai-machergan, degi, mai-omegan baksad. Maimar-an-neggi-gwalulesmalad an nikusbalid. Jerusalén-neggweburgi-an-idu-dummagan-megismaladba, an burbule molimar-bebe-nikad nikusad, degi, sibad-wawaadmar an nikusbalid.

<sup>8</sup> An ormar, degi, manimar ichesur nikusad. Rey-bamalad-e-ibmar-nuegan an susad, degi, dule-yar-bamaladgi-bukwamalad-e-ibmar-nuegan an susbalid. Machergan-angana makmalad, degi, omegan-anga-namakmalad an nikusgusad. An wergudiidbali, an ome-baigan-bukidar nikusbalid.

<sup>9</sup> Jerusalén'gi-an-idu-dummaganga-megismaladi, anyobi nug-dummarbaa nikussurmalad. Deginbali, anyobi nuebinsaed-nikaa gussurmarbalid. <sup>10</sup> Bela an-ibmar-imakbigusadi, an imaksad. Bela ibmar-galagwensuli-imakedgi-yeer-itogedi, an itosbalid. Bela an-arbasadgi an wergudii gusad. We-ibmarmar-imaksadgi an yeer itosad.

<sup>11</sup> Geb sorbali, bela-ibmar-imaksadgi an binsadii gusad. Bela ibmar-imakega an dummad-

arbadigusadgi, an binsadii gusbalid. An bela we-ibmarmar dakalid, bela wedi, binsarsunna imaklegedi, degi, gwage-nunmaked ukbalidi, egi ibmar-nued amilesurbalid.

### *Bela dulemar burgwemaloedbiid*

<sup>12</sup> Geb sorbali, an binsadii gualid, nue-binsaed-nikagued, wede ibi obarlege, binsaedsulibmar-imakleged, ibi obarlebali, degi, yogasaar-sunmakleged, ibi obarlebali. Ar dule rey-sorba-megnonikoedi, ¿ibu-ibmar-baid imaknonikosunna? Ibmar-baid-imaked sate. Ar ade, bato bela ibmar imaklesad.

<sup>13</sup> An daknonikid, ar igi neg-meegwad negsichidba bur nued gue. Deyobi, nue-binsaed-nikagued, yogasaar-sunmaklegedba bur nuedid.

<sup>14</sup> Dule-binsaed-ibed, magasar neg daked.

Dule-binsaedsuliddina, aku neg daked.

An daknonibalid, bela dulemar burgwedse-marbalid. <sup>15</sup> Geb degine, an sogdesunnad: “Dule-binsaedsulid-burgwedyobi an burgwemogoed. Degisoggu, ¿ibiga an binsaed-ibedga gubisunna?” Degisoggu, an daknonibalid, we-ibmar binsarsunna imaklebali.

<sup>16</sup> Ar dulemar, dule-binsaed-ibedgi, degi, dule-binsaedsulidgi bar binsaosurmalad. Ar birgamar-namaidba bela iedmaloed. Dule-binsaed-ibed, dule-binsaedsulidyoobi burgwemogoed.

<sup>17</sup> Degisoggu, an we-napneggi-gudiidi, isdar an itononisunnad. Ar ade, bela we-napneggine ibmar-imakleged nabir anga nosulid. Ar bela we-ibmarmar binsarsunna imakleged, gwage-nunmaked ukbalid.

**18** Deginbali, we-napneggi arbaed-dummad-an-imaksadi, gwen-nabir an daknonisurbalid. Ar bela arbaed-dummad-an-imaksadi, dule-an-sorba-megnonikoedga an obegergebed.

**19** An-sorba dule-reyga-megnonikoedi, binsaed-ibedga guodibe, binsaedsulidga guodibe, amba bai daklegosulid. Degi-inigwele, dummad-an-arbasadgi-ibmar-nikusadi, degi, binsaed-nikaguedgi-an-ibmar-imaksadgi-ibmar-nikusadi, we-reygadga gunonikoed. Ar we-ibmarmar binsarsunna imaklebalid.

**20** We-napneggine, an dummad-arbasad-ulale, an gwen nabir itononisurbalid. **21** Ar gwen-gwen-dulemar, ibmar-nikuega e-binsaed-nikad ebudamalad, ibmar-nikuega e-ibmar-wisid ebudamalad, degi, ibmar-nikuega e-ibmar-durdaksad ebudamalad.

Ar sorbardi, dule-gwen-arbassulidga bela e-ibmar-nikuedi, obegoed. Ar weyob ibmar-guedi, gwen nabirsulid. We-ibmarmar, binsarsunna imaklebalid.

**22** Dule we-napneggi arbaed-dummad-imakedgi, surbinsa-alamaknaidgi, degi, bukib-binsaed-abalagi-alamaknaidgi, ¿ibu-ibmar-nued egi nikue? Sate. **23** Ar dulega bane-bane wile-itogedbi, degi, arbaed-dummad-imakedbi neg naid. Mutikidse-bakale, gwen obunnosulid. We-ibmarmar binsarsunna imaklebalid.

**24** Degisoggu, unnila masgunnedgi-yeer-itogedi, gobedgi-yeer-itogedi, degi, e-arbaedgi-yeer-itogedi, dulega bur-nued gued. An daksabalid, we-ibmala Bab-Dummadgi danibali.

**25** Ar Bab-Dummad dulegi-nabir-binsasulile,  
¿doa nabir mas-gunnoe? ¿Doa yeer itobaloe?

**26** Bab-Dummad dule-yeerdakedga, binsaed-nikagued uked, ibmar-nue-wisi imaked, degi, yeer-itoged ega ukbalid. Ar dule-isganagardina, ibmar-onmakedgi-arbaed ega uked. Adi, sor-bali, we-ibmar dule-yeerdakedga ukegar. Ar we-ibmarmar binsarsunna imaklebalid, degi, gwagenunmaked ukbalid.

## **2. WE-NAPNEGGI-DULEMAR-GUDIID**

### 3

*(3:1-12:8)*

*Ibmar-imaklegega bela e-ibagan nikad*

**1** Ibmar-imaklegega bela e-wachi nikad. We-napneggine, ibmar-imaklegega bela e-ibagan nikabalid:

**2** Gwaluleged-e-iba nikad,  
burgwileged-e-iba nikabalid.

Ibmar-gwag-digleged-e-iba nikad,  
ibmar-gwag-ungeleged-e-iba nikabalid.

**3** Oburgwileged-e-iba nikad,  
onuguleged-e-iba nikabalid.

Ibmar-earileged-e-iba nikad,  
ibmar-sobleged-e-iba nikabalid.

**4** Boleged-e-iba nikad,  
alleleged-e-iba nikabalid.

Dule-burgwisadba wile-itoleged-e-iba nikad,  
yeer-itogedba gwirleged-e-iba nikabalid.

**5** Akwamar-osamakleged-e-iba nikad,  
akwamar-weleged-e-iba nikabalid.

Angaagwar-imakleged-e-iba nikad,

degeimaloye-sogleged-e-iba nikabalid.  
**6** Ibmar-imaklebienad-e-iba nikad,  
     ibmar-imaklebisulid-e-iba nikabalid.  
 Ibmar-saboleged-e-iba nikad,  
     ibmar-mileged-e-iba nikabalid.  
**7** Ibmar-esirmakleged-e-iba nikad,  
     ibmar-makleged-e-iba nikabalid.  
 Sunmaklesulid-e-iba nikad,  
     sunmakleged-e-iba nikabalid.  
**8** Sabguleged-e-iba nikad,  
     isdar-dakleged-e-iba nikabalid.  
 Bila-onoleged-e-iba nikad,  
     neg-bogidik-naguleged-e-iba nikabalid.

*Arbaedgi alamaknaiguedi, binsaledid*

**9** Ar dule arbaedgi alamaknaiguedi, ¿ibu-nued egi nikue?

**10** An daksad, Bab-Dummad dulemarga arbaed-dummad uksad, adi, arbaedgi alamaknai gumalagar. **11** Bab-Dummad e-iba-sogedba bela ibmar-yeerdakle imaksad. Deginbali, dule nabir epenne-ibmar-gusmalad-magar-itogega, degi, yoedse-ibmar-guoed-magar-itogega imaksabalid. Degi-inigwele, dule, bela Bab-Dummad negasailagi-ibmar-imaksad, degi, yoedse-ibmar-imakoed wissulid.

**12** An wisdo, dule na dula-gudiidgine wer-gudiguedba, degi, ibmar-nued-imakdiguedba, bur ibmar-nued-baidi, sated. **13** An wisbalid, nabir-masgundiguedi, nabir-gobdiguedi, degi, dummad-arbasadgi-yeer-itodiguedi, Bab-Dummad dulega uksabalid. **14** Amba an wisbalid, bela-Bab-Dummad-ibmar-imaksadi, degisadegu

gued. Na e-ibmar-obinnisadgi ibmar-baid geg nasikleged, geg bar osulolebalid. Bab-Dummad bela deyob imaksad, adi, dulemar e-dobekwaa nanamalagar.

**15** Emi ibmar-bukwadi, bato dikasurgus bukwad.  
Ibmar-gunonikoedi, bato gudiid.  
Bab-Dummad gannar-ibmar-guega imaked.

### *Igar-innikigwadba ibmar imaklesulid*

**16** We-napneggine ibmar-baid an daksabalid:  
Igar-itolegedgi, igar-isgana imakleged. Igar-innikigwad-imaklegedgi, igar-isgana imakleged.

**17** Geb an binsadsunnad:  
“Bab-Dummad dule-nuedga igar itogoye, degi, dule-isganaga igar itobaloye. Ar ade, bela-ibmar-guedga, igar-itoleged-iba nikaye. Bela-ibmar-imaklegedga igar-itoleged-iba nikabarye.”

**18** An dulemargi binsasbalid: “Bab-Dummad dule-wilubdaknaiye, adi, dulemar na magar itomalagarye, emarde, ibdurganyob gumarye.  
**19** Dulemar ibdurganmaryob bergumarmogad. Ebobela ega igar yopira maid. Ebobela na yopira burgwemalad. Ebobela dulagudiguega bunnodigued abeged. Degisoggu, dule ibdurgangi obinsulid. Ar napiragwa, bela wemar gwen nabirsulid, **20** degi, bela napa-urba megmaloed. Bela napagi danimalad,

bela gannar napaga binyemarbaloed.

**21** ”*¿Ar doa wissunna, dule-e-burba niba nad-dae? ¿Ar doa wissunna, ibdurgan-e-burbadi neg-urba aideddae?*”

**22** An daksasunnad, dule, e-arbaedgi-wergudiguedba bur ibmar-nued-imaked sated.

Ade, arbaed-igar ega uklesad. E-burgwisad-sorba ibmar-guoed-dakega, ¿doa we-dule-burgwisad gannar-dagega imakoe?

## 4

### *Dulemar-mesagwar-imakledimalad*

<sup>1</sup> An dakdebalid, we-napneggine, dule-mesagwar-imakledimalad yaisulid. Dule-mesagwar-gudimaladi bodidii an daksad, dule-gadi-gadi-e-gwage-imakedi sate gudimalad. Dule-mesagwar-gudimaladi, dule-gadi-gadi-e-gwage-imakedi sate gudimalad. Dule-wemar-mesagwar-imakdimaladi, gangued nikamalad.

<sup>2</sup> Degidbali an binsaded, dule-burgwismaladi, dula-gudimaladba bur weligwar gumalad. <sup>3</sup> Ar degi-inigwele, amba yoo-gwalulemaladdi, bur bule wemarba weligwar gumalad. Ar ade, we-napneggi ibmar-isgana-imaklemalad amba yoo dakmalad.

<sup>4</sup> An daksabalid, arbaed-dummad-imakedi, degi, ibmar-imakedba-nasgumaiguedi, nobed uked.

Wedi binsarsunna imaklebalid, gwage-nunmaked ukbalid.

<sup>5</sup> Dule-binsaedsulid, gwen arbasuli ukudmaad burgwidoed.

<sup>6</sup> Sikwas-obunnolegedi, doggus-obicha-arbaedba bur nuedid.

Ar doggus-armaedi, gwage-nunmaked uked.

### *Bulakwaa-arbaed gargangued uked*

<sup>7</sup> We-napneggi, ibmar-binsarsunna-imakleged-baid an dakdebalid:

**8** Dule-wargwenad mimmigansuli gudiid, degi, gwenadgansuli gudibalid, bipisaar arbaed indakdisulid. Bato-ibmar-nikadi amba yeeritosulid, bur bule ibmar nikubied. Gwen binsasurbalid, doaga ede alamaknai. Gwen werguedgi binsasurbalid.

Wedi binsarsunna imaklebalid, arbaed-dummad gued.

**9** Dule-ebogwad, dule-wargwenadba bur nuedid. Ar na e-arbadiidgi bur bule ibmar-nuegan nikumalad.

**10** Ar gwensak aimukudele, baid ogwichoed. Ar dule walagwen-gudiiddi, aimukudele, dummad-wilegoed, ar dule-baid-e-ogwisgued sateoed.

**11** Ar dule-ebogwad na walikaa megmalale, na muchub-muchub uee imakmaloed. Ar dule walagwen-megerdi, ¿igi na uee itogoe?

**12** Dule walagwenale, sunna dule-baidse galakued. Ar ebogwardina, sunna dule-baid-abin ganna gwisgumalad. Dub-giapaa-bipirmakaledi, irgwensuli itirsulid.

### *Sapingwa-gued, binsaed-nikagued*

**13** Sapingwa-wilesakwagwad binsaed-ibed-gudiid, bur nuedid, rey-sered binsaedsuli-gudiidba. Ar we-reyde, dule-ega-binsaed-uked bar abesulid.

<sup>14</sup> Ar we-sapingwa, esgaryagi-mellesii gusdibe, e-yarginé wilesakwaa gwalulesdibe, <sup>15</sup> degi-inigwele, we-napneggine an daksad, we-sapingwa rey-sorba reyga-megnonikile, dulemala eba nanai damalad.

<sup>16</sup> Ar amba dule-bukidar we-sapingwa-gebe-reyga-megidedgi eba nagusdamar-inigwele, degite, dule-danimarmogoedi amba we-rey gwen yeer dakosurmarmogad.

Amba we-ibmala binsarsunna imaklebalid, gwage-nunmaked ukbalid.

## 5

### *Ibmar-imakoye-sogsad imakergebed*

<sup>1</sup> Bab-Dummadse-goled-negse be nadele, mer be yogasaar ibmar imako. Agi ibmar-odurdaklenaid-itoged bur nuedid, dule-binsaedsurmalad Bab-Dummadga ibmar-ogumakar-ukedba. Ar we-dulemardi, ibmar-isgana-imaknanaid aku-itodamalad.

<sup>2</sup> Bab-Dummad-asabin, mer be ibmar sogdebin imako,  
deginbali, mer be gwae-gwae binsabalo.

Ar Bab-Dummaddi nibneggi maid, bedi, napneggi gudiid.

Degisoggu, nue-itoakwaa be ibmar sogo.

<sup>3</sup> Ar dule-gadi-bukib-binsaedi, gabmaile, gadi gwayedaaed.

Dule-gadi-sunmakedi, yogasaar sunmakdaed.

<sup>4</sup> Bab-Dummadga be ibmar-imakoye-ise-sogar-sogsale, gwaе be imako. Ar Bab-Dummad dulebinsaedsulidamalad nabir-dakdasulid. Be ibmar-imakoye-ise-sogar-sogsad, be imake.

<sup>5</sup> Ibmar-imakoye-ise-sogar-soged-sogsadba, degi, imaksulidba,  
ibmar-imakoye-ise-sogar-soged-sogsulid bur  
nuedid.

<sup>6</sup> Mer be-gwabin-duku isguega-be-imaked be imako. Geb sorbali, dule-Bab-gayaburba-berbegedga mer be sogo, an ibmar-sogbisulid sogsaye, an noar sunmaksaye. Ar noar be sunmaksadba, binsarsunna Bab-Dummad be ourwoed. Binsarsunna be-ibmar-imaksad be-ibe-obelogega imakoed. <sup>7</sup> Degisoggu, bukidar-ibmar-binsarsunna-imakleged-abargi, bukidar-gwayed-abargi, degi, bukidar-yogasaar-sunmakleged-abargi, bur be Bab-Dummad-dobekwaa nanae.

### *Ibmar-bukidar-nikuleged binsarsunna gued*

<sup>8</sup> Yar-gwensakgi, dule-dummad dule-wileged-sabsur-imake be dakalile, degi, dulemarga igarnabolegedi innikigwadba imaksuli be dakalile, mer be geger dako. Ar weyob ibmar-gued, ade, dule-dummad eba-bur-dummad-e-bendaked nikad. Deginbali, dule-baid-eba-bur-dummad, eba-bur-dummagan-e-bendaked nikamogad.

<sup>9</sup> Weyob-ibmar-guedi, ¿ibu-nued yar-naid egi nikue? ¿Reyde, nainugi-arbamalad-bendakega mai? Eye, bendakega maina.

<sup>10</sup> Ar dule-manibina-sulibinsa-itogedi, bur bule mani-nikubidaed. Ar dule-ibmar-nueganbina-sulibinsa-itogedi, bur bule ibmar-abedaed. Amba we-ibmarmardi binsarsunna imaklebalid.

<sup>11</sup> Ar mani-bukidar-nikulegele, mani bur bule oeledabalid. Mani-ibed unnila mani-e-wagarbi dakoed egi buu-nasoed. Ibmar-nued egi nikousulid.

<sup>12</sup> Arbaed-dule, immediki mas-gundibe, wilubba mas-gunbardibe, bonisuli gabdiid. Dule-mani-ibeddina, doggus-mani-nikadba gwen nue gabdisulid.

<sup>13</sup> We-napneggine, boni-dummad an daksad: Dule mani-bukidar-sabogege, egi aibinega gued. <sup>14</sup> Degi, ibmar-uklegedgi yogasaar-mani-ebulegedba mani yoggued. A-ular, wedule, machi-nikunonikile, e-machiga bar mani obegosulid. <sup>15</sup> Ar igi we-napnegse aidenoniki, deyobi, gannar nabaloed. Ar igi we-napnegse uka-swiri noniki, deyobi, e-dummad-arbasadgi-ibmar-nikusadi gwen sedosulid.

<sup>16</sup> We-ibmar, boni-dummadbalid. Ar igi-dule napnegse aidenoniki, deyobi, gannar nabaloed. Ar dule arbaed-dummad-imakedgi, ¿ibi nued amie? Sate. <sup>17</sup> Deginbali, ar we-dulede, we-napneggine wile-itogedgi, arbaed-dummad-imakedgi, bonigan-abalagi, degi, sae-itogedgi mas-gundiid.

<sup>18</sup> Weyob an daknonikid: We-napneggi-gudiidgi masgunned bur-nuedid, gobed bur-nuedid, degi, arbaed-dummad-imakdiidgi yeer-itodigued bur-nuedid. Ar weyob Bab-Dummad abesad, we anmarga uklesad. <sup>19</sup> Deginbali, Bab-Dummad, ar doaga mani-bukidar uke, degine, ibmar-nuegan-bukidar ukbali, deyobi, a-dulega, we-ibmarmar-uklesadgi-werguega imakbalid, deginbali, egi

masgunnega imakbalid, egi gobega imakbalid. Ar weyob-dulega-guedi, Bab-Dummad uksad.

**20** Ar Bab-Dummad weligwar dule-imaksoggu, dule, we-napneggi-sikwas-gudiidgi dogdar bukib binsasulid.

## 6

### *Dule binsarsunna we-napneggi gudiid*

**1** We-napneggine, dulemar-abargi we-boni nue-nika an daksad: **2** Bab-Dummadi, abar-dulemarga ibmar-bukidar uked, mani-bukidar-nikuega imaked, deginbali, dule-nug-odummogega imakbalid. Degidbali, we-dulemar na ibmar-abegedba nikued. Degi-inigwele, Bab-Dummad, we-dule e-ibmar-nikuedgi-werguega imaksulid, aka dule-bamalad e-ibmargi-werguega imaked. Weyob-ibmar-guedi, gwen nabirsulid, boni-dummad dakleged.

**3** Ar dule-gwensak mimmigan dulatar-nikadibe (100), degine, birga-undar-gudii gusbardibe, ar ibmar-nuegangi-wergudigussuli-burgwisale, yogasaar-diglesale, an sogdo, bur mimmi-gwensak-burgwar-aidenonikir, bur we-duleba nuedye.

**4** Ar we-mimmi-burgwar-aidenonikid gwen neg daksasulid, degine, negsichigi megidapid. Deyob negsichigi-megidapidgi gwen bar egi binsaledsurbalid. **5** We-mimmide, gwen dad-ibeler-daksasulid, gwen neg-wisgussulid.

**6** Degi-inigwele, we-mimmi, dule birga-milibogudigusadba (2,000), degi, gwen-ibmar-nuegangi-wergussur-gusadba, bur bogidikid nue-nikusad.

¿Ar bela dulemar bergunonikile, burgwed-negse bela naedsemarsursi? Bela naedsemalad.

<sup>7</sup> Dulemar mas-gunnegala arbaedginbi alamakdidamalad, degi-inigwele, e-ukuddi gwen bergusurbalid.

<sup>8</sup> Ar dule-binsaed-ibed, ¿ibuginbi dule-binsaedsulidgi-obinsisunna?

Ar dule-wileged, nabir-bonigan-abin-gwisgudiidgi, ¿ibi-nued egi amimosunna? Ar e-bogwad na yopira bonigangi obindimalad.

<sup>9</sup> Ibmar-sanakwa-daklegedi, ibmar-ulubginbi-abelegedba bur nuedid. Ar we-ibmar gwen nabir-surbalid.

<sup>10</sup> Ibmar-gudiidi bato e-nug nika gudiid, ar bato wisgulesad, we, dule gue.

Deginbali, dule, gege dule-bur-eba-niga-gandikidbogwa urwed.

<sup>11</sup> Gadi-sunmaklegedgine, yogasaar sunmak-leged.

Ar we-ibmargi, ¿ibu-ibmar-nued egi amilesunna?

<sup>12</sup> Degisoggu, we-napneggi wis sikwas-gudiidgine, dule wissulid, ibu ega nued noe. Degisoggu, we-napneggi, unnila sikwas-gudigued, gwen nabirsulid. Ar dule-gudiid, burwa-goleyob sikwas-buu nasoed. Ar dule burgwisad-sorba, ¿doa ega sogosunna, igi neg guoye?

## 7

### *Binsaed-nikagued, binsaedsulidaed*

<sup>1</sup> Ina-wawadikidba nug-nued-nikuleged, bur nuedid.

- Gwaluleged-ibaba burgwed-iba, bur nuedid.
- <sup>2</sup> Iba-dummad-nonaidse-ataknaedba dule-burgwisadse-ataknaed, bur nuedid.  
 Ar dule bela burgwedsegad, degisoggu, dulemar-dula-gudimalad, burgwedgi binsadii gumarlawilubbinad.
- <sup>3</sup> Allelegedba boleged bur nuedid.  
 Ar boleged amba wile-ito emar-imak-inigwele, gadi-gadi gwage-imakbalid.
- <sup>4</sup> Dule-binsaed-ibed, dule-burgwis-naidse-ataknaadele, binsaed-nikaa daed.  
 Dule-binsaedsuliddina, ataknaadele, unnila dodogedginbi binsadaed.
- <sup>5</sup> Dule-binsaedsulid yamo emar-ogannogedba, dule-binsaed-ibed emarga sabsur-ibmarsoged, bur nuedid.
- <sup>6</sup> Dule-binsaedsulidaed-e-alledi, ikomar-gummakder doos-doos-gotedaeyobid, yog-berguar naddaed.
- <sup>7</sup> Sabsur-ibmar-imakleged dule-binsaed-ibed-oichoged.  
 Ibmargin-bennuklegar-binsaed-galeged, dule-binsaed-ibed-e-gwage oichobalid.
- <sup>8</sup> Ibmar-gebe-imaklegedba, ibmar-nagase-oboleleged, bur nuedid.  
 Dule-na-san-dummarba-imakdiidba, dule-na-ulubgi-bargaagwar-gudiid, bur nuedid.
- <sup>9</sup> Mer urwed begi-obinega be imako, ar urweddi, dule-binsaedsulidaedgadid.
- <sup>10</sup> Mer be sogo, ibiga ibagan-nasmalad bur nuegan gusye. Weyob-sunmaklegedi, binsaed-ibegan-sunmakedsulid.

**11** Dulemar-we-napneggi-gudimalad binsaed-nikagued-nikale, nuedid. Degin, nainu-nikabalile, doggus bur nuedid. **12** Binsaed-nikagued emar-bendaked, mani-nikued emar-bendakmogad. Degi-inigwele, binsaed-nikagued bur biriginedith, ar adi, nuedgi-sered-megega dule-imaked.

**13** Bab-Dummad-ibmar-imaksad be dakena: Ar Bab-Dummad ibmar-dopere-imaksadi, ¿doa bar inniki imakosunna? **14** Bega ibagan-nuegan-nonikile, egi be werguo. Amba bega ibagan-isgana-nonibalile, Bab-Dummadgi-danibarye be binsabalo. Ar dule wissulid, ibagan-danikoedi, igi danibali.

**15** Wegi-wile-itodiidgi an we-ibmar belagus dakdanikid: Dule-nuegan, ibmar-inniki-imakdiid-ular, sabsur-ibitodimalad. Ar dule-isganamardina, ibmar-isgana-imaked-inigwele, aka bur undar-seredi megmalad.

**16** Mer doggus be wilub-obicha an dule-innikigwadye be sogo.

Mer doggus be wilub-obicha binsaed-ibed na be sao.

Abakalegi na be dukin oitoalile.

**17** Mer doggus dule-isganaga na be imako, mer dule-binsaedsulidga na be imakbalo. ¿Ar ibiga na be durbas burgwed aminonikosunna?

**18** Mer doggus wilub-obicha na be dao, wilubba na be gudii guoed.

Ar dule, Bab-Dummad-dobekwaa-gudiile, bela ega ibmar nueganbi guedoed.

- <sup>19</sup> Dulemar-bulegan-ambegid (10) neggwebur-semaladba,  
 binsaed-nikagued dule-binsaed-ibed-ogannoged, bur nuedid.
- <sup>20</sup> Dule, bela-belad-innikidaedi, bela-belad-ibmar-nued-imakdibalidi,  
 gwen bipisaale isgudisurbalidi, we-napneggine, sated.
- <sup>21</sup> Mer yogasaar-sunmaklegedba be aibiro. Adi, be-mai-begi-ichakwa-sunmaked, be itogosulid.  
<sup>22</sup> Ar be nue-wismogad, emargi-ichakwa be sunmaksamogad.

### *Ibmar-gued-e-burbamar baramilenaid*

<sup>23</sup> Binsaed-ibed-dulega an guoye na sogsgusananad, bela we-ibmar an-binsaed-nikadba an baraminai gusanad. Degi-inigwele, amba bela an ibmar magar-itosulid. <sup>24</sup> Bela-ibmar-guedi yeer angi gangu noed, amba an magasar-itosulid. ¿Doa we-ibmar bela baramiosunna?

<sup>25</sup> Degisoggu, binsaed-nued-bar-amiega an guarsunnad, ulub-nagasega ibmar-gumaid-bar-amiega an gualid. Degidbali an neg-daknonikid, dule-isgana-gued binsaedsulidaedid, degine, binsaedsulidaedi, igar-gwen-nabirsulidid.

<sup>26</sup> Deginbali, we-ibmar bur boni-dummad an daknonibalid: Ome-isgana, burgwedba bur bule boni uked. We-ome-e-gwage-naidi, sakiyob emar-gaed, e-swidamala, esgoro-dubyob emar-edinned. Ar dule Bab-Dummadbaligwa-gudidibe, we-omese galegosurguoed. Isgued-duledina, we-omese ibitogoed.

<sup>27</sup> Bab-Dummad-gayaburba-barsoged sogded: “Bela an ibmar-sog-soggwen baraminai-gusgua, an weyob ogwinmaknonisunnad:

<sup>28</sup> ”An ibmar-amidiidi, amba an yoo baramied. An dula-miligwenad-abargine (1,000), dule-macheder-amidiidi, an wargwen aminonikid. Ome-nued-gwensakdina, wargwensaale gwen an amissurgusad.

<sup>29</sup> ”Degisoggu, unnila webi an magar-itonikid: Bab-Dummad dule-imaksadi, dule-bonisuli imaksanad. Degi-inigwele, dule na e-daedba, dukin na bonigan-amisad.”

## 8

<sup>1</sup> ¿Doa-dule binsaed-ibedyob gue? ¿Doa-dule bela-ibmar-wisid gudii? Dule, binsaed-nued-nikadbali, e-daklegedi, weligwar-dakleged, degine, e-daedi, nued dabalid.

### *Reyba-ibsaed*

<sup>2</sup> Degisoggu, an bega soged: Rey-e-ibmar-sogmaidbali be ibsao, ar Bab-Dummad-asabinni deyob-imakoye be sogsad. <sup>3</sup> Melle be rey-asabin-gwichidgi gwae-gwae-nodebin sao. Mer ibmar-isgana-imakedgi be binsabalo. Ar ade, rey na e-ibmar-imakbiedba ibmar imaked. <sup>4</sup> Ar rey-e-sunmakedi gargangued nikad, degisoggu, ¿doa ese golosunna ibu be imaknaiye?

<sup>5</sup> Ar dule rey-sogedba daele, gwen akar-guosulid. Dule-binsaed-ibedi na wisid, sana reyba ibsaoe, degine, igi imakbaloe. <sup>6</sup> Ar bela-ibmar-imaklegedi, e-ibagan nikad. Degine,

igi ibmar-imaklebaloed-igar nikabalid. Deginigwele, dulega, we-ibmar, boni-dummad gued:  
 7 Bonigan-egi-gwisgunonikoed wissulid, degine, dule-ega-ibmar-guoed-soged satebalid. 8 Dule burgwed-bargaegala, gargangued nikasulid, na degisadegu-gudiguega, gargangued nikasurbalid. Ar burgwed-igargine, gege dule wakinned, dule-isganase-bakale, gege wakinned.

### *Ibmar-yogasaar-imakleged*

9 An we-napneggi ibmar-gued bela-bela an nue-wisgubiguargua, an daknonikid: Imbagwenale, dule, e-maiga dule-baid-imakele, ega boniga gunonidaed. 10 Deginé, an daksabalid, dule-isganamar-burgwisale, iba-dummad-abalagi digledaed. Deginé, dulemar Babse-goled-negse-nanadimaladdina, na e-neggweburgi-gudigusmaladgi ielededaed, gwen bar egi binsaledasulid. We-ibmar gwen-nabirsulid.

11 Dule-isgana ibmar-isgana-imaksale, abgayala ega igar nabolesulile, dulemar binsaddamalad, igar-isgana-imakleger, akarsurye. Degisoggu, ibmar-isgana-imakedgi aka gatik burguddamalad.

12 Dule-isgana bali-bali isguedginbi-alamakdiidi, sunna undar gudii gubalid. An wisbalid, dule-Bab-Dummad-dobekwaa-gudiidi, degi, e-nug-odummodibalidi, bur nued gudii guoed. 13 Dule-isganamargardina, bela ega ibmar boniga gudoed. Ar unnila sikwas gudii gumaloed, waa-yogguddaeyob gumaloed. Ar we-dulemar, Bab-Dummad-dobekwaa gudisurmalad.

<sup>14</sup> We-napneggi galagwensuli ibmar gued, degine, igarsuli ibmar gubalid. Imbagwenale, dulemar-inniki-gudimalad dule-isganayob ega ibmar guddaed. Degine, dule-isganagardina, imbagwenale ega ibmar nueganbi naddaed. An sogdo, we-ibmar gwen nabirsurbarye.

<sup>15</sup> Degisoggu, an soged: Wergudii gumarsun. Ar anmar we-napneggi-gudiidgi Bab-Dummad-anmarga-ibmar-uksadbal, bur mas-gundii gumarsun, gobdii gumarbarsun, wergudii gumarbarsun. Ar galitodiid-sorba, we-ibmarbi wis anmarga besad. Ar we-ibmar-birgi ibmar-baid sulid.

<sup>16</sup> We-napneggi binsaed-nued-balamiegala, degine, we-napneggi-ibmar-gued-balamiegala, ise-dakale an imaknai gualid. Degidbali, ibginedse-bakale, nue bar an gabdisulid. <sup>17</sup> Geb deyobi, Bab-Dummad-we-napneggi-ibmar-imaksad an daknonikid. Ar dule Bab-Dummad-bela-ibmar-imaksad bela magar itogosulid. Ibmar-magar-itogegala, aisaar alamaknai guoenad, degite, baramiosurguoed. Ar amba, dule-binsaed-nikarbad sogdibe, an magarneg-itoye, degi-inigwele, nagase amba magartosurmogad.

## 9

### *Bela dulemar igar-soggwennase bergusiid*

<sup>1</sup> Bela we-ibmarmar-wisguegala, an egi alamaknai gualid. Wegi an daknonikid, dule-innikidamalad-e-ibmar-imakmaladi, degi, dule-binsaed-ibegan-e-ibmar-imakmaladi, Bab-Dummad-e-argan-yaurgi siid. Anmar amba

wissulid sabgued, ibu obare, sae-emar-daked, ibu-obarbali. Amba, anmar-asabinni we-ibmar oyole-inigwele, magar-itolesurdaed. <sup>2</sup> Bela dulemar yopira guedbimalad:

Dule-innikidaeddibe, dule-ichakwadaeddibe,  
amba yopira burgwedsemalad.

Dule-nueddibe, dule-isganadibe,  
amba yopira burgwedsemalad.

Dule-swilidikiddibe, dule-swilidiksuliddibe,  
amba yopira burgwedsemalad.

Dule-ibmar-ogumakar-ukeddibe, dule-ibmar-  
ogumakar-uksuliddibe,  
amba yopira burgwedsemalad.

Dule-ibmar-nued-imakdeddibe, dule-ibmar-  
isgana-imakdeddibe,  
amba yopira burgwedsemalad.

Dule-ibmar-ise-sogar-imakeddibe, dule-ibmar-  
ise-sogar-imaksuliddibe,  
amba yopira burgwedsemalad.

<sup>3</sup> We-napneggi, ibmar-imakleged-abargi,  
we-ibmar gwen nabir nosulid: Bela dulemar  
na yopira guedsemalad. Deginbali, dule e-  
gwagegine, ibmar-isganaginbi binsadiid. Dule-  
gudiidi, unnila galagwensuli binsadiid. Ar bela  
burgwemaloedbiid. <sup>4</sup> Degisoggu, dule na dule-  
bamalad-abargi dula-garmakdiir, wis nubin  
itoged.

Agala an soged:

Rey-burgwedba, dule-belagwad-  
dulagudigued, bur nuedid.

<sup>5</sup> Ar dulemar amba dula-gudimaladi,  
e-burgwemaloed na wismalad. Dule-  
burgwismaladdina bar ibmar-abemaisurmatalad,

ar bar-itomaisurmalad. Deginbali, gwen egi bar-binsalesurbalid. <sup>6</sup> Ar e-daedi, e-sabguedi, e-sae-itogedzi, ibmarbina-sulibinsa-itogedzi, burgwisadgi, bergusiid. Ar we-napneggi, gannar weyob-guoedgi-binsaodeeye bar binsamaiosulid.

<sup>7</sup> ¡Weligwaledgi mas be gunne! ¡Yeer-itogedgi vino be gobbal! Ar Bab-Dummad be-ibmar-imaksadi, yeer be-ibe daksad. <sup>8</sup> Na be mordagudikmaladbi yodigu guo, gwallu-wawad nonogi be magakwaa-gudigu guo. <sup>9</sup> Na be ome-bela-bela-abegedbogwa, bane-bane wergudii gusun. Ar Bab-Dummad, we-napneggi sikwas-gudiguega be-imaksad. We-napneggi, ibagan-gwen-nabir-nanamaisursoggu, na be wegi wergudii gusun. We-napneggi-alamakdiid-nukad, we-werguedi wis bega uklesad. <sup>10</sup> Ibu-ibmar-imaked bega uklenonikile, imakedse be sao, melle be imaksuli guo. Ar be burgwisardi bar arbaosulid, ibmar-wisguleged-igar surbalid, degi, binsaed-nikagued-igar surbalid.

### *Garganguedba binsaed-nikaa-ibmar-imakleged bur nuedid*

<sup>11</sup> We-napneggi an negdaknonibalid: Abarmaklegedgi-bengulegedgi dule-sabsur-abarmakedbi emargi obinsulid.

Bila-onolegedgi dule-gargangued-nikadbi emargi obinsulid.

Dule-binsaed-ibedbi mas gunsulid.

Dule-ibmar-wisirbaadbi mani-ibedga gusulid.

Dule-nue-garda-wismaladbi e-bina soglesulid.

Ar bela dulemarga, imbagwenale, ibagan-nued  
ega nonidaed,  
imbagwenale, ibagan-isgana ega  
nonidabalid.

**12** Deginbali, an daksabalid, dule na  
e-burgoed-ibagan wissurbalid. Uamar-  
sakigi-galedamaladyob gued, sikwimar-  
galedamaladyob gued. Ar dulemar ukiagwar  
boniganse galeardamogad.

**13** We-napneggi an we-ibmar-daksabalid, egi  
an nue-durdaksabalid: **14** Neggwebur-bipigwadi  
dulemar-iche-nika an daksad. A-neggweburgine,  
rey-buledi neggwebur-suega e-sordamarbo ebiris  
ambikunoni gusad. We-rey, e-sordamarbo,  
neggweburgi-dogega dikarba napa arsanyob  
onakwismalad.

**15** We-neggweburgine, dule-wileged gudiid.  
We-duledede, dule-binsaed-ibedid. We-dule,  
e-binsaed-nikadbali, neggwebur-bendaksa  
gusad. Degi-inigwele, dulemala we-dulegi gwen  
binsassurmalad.

**16** Andi sogdo: “Dule-wileged-e-binsaed-nikad  
isdar-daklege-inigwele, deginbali, e-sunmaked  
itolebisuli-inigwele, ‘ar garganguedba binsaed-  
nikaa-ibmar-imaklegedi, bur nuesdye.’ ”

**17** Dule-binsaed-sulidamalad-e-dummad  
binnasuli-sunmakedba,  
dule-binsaed-ibed-binnasdikii-sunmaked  
bur nabir itoleged.

**18** Gingimarba, binsaed-nikagued bur sunsogedid.  
Ar dule ibmar-soggwengi wis nosale, bela ib-  
mar oichoged.

**10***Binsaed-nikagued sunmaknaid*

- <sup>1</sup> Gukur-burgwaled neg-nunu-yapanne imaked,  
degidbali, ina-wawa-sobed-ibe ina-  
wawadikid oichoged.
- Deyobi, gaya-isgana-sunmakleged, bela dule-  
binsaed-ibed-e-sunmaked oichoged,  
e-nug-nued oichobalid.
- <sup>2</sup> Dule-binsaed-ibed-e-gwage ibmar-nued-  
imakedgi binsaed.  
Dule-binsaedsulidaed-e-gwagedina, ibmar-  
isgana-imakedgi binsaed.
- <sup>3</sup> Dule-binsaedsulidaed, ar ibu imakalile, e-ibmar-  
imakedgi magasar na oyoged,  
ede, dule-binsaedsulidyé.
- <sup>4</sup> Dule-sapin-dummad-negsemaid bese ulualile,  
mer be abin-imakdebin sao.  
Ar san-bargaagwar-imaklegedi, bukidar  
ibmar-noar-imakleged bargaed.
- <sup>5</sup> We-napneggi-gudiidgine, an daksabalid,  
sapin-dummagan-negsemamaidi, weyob ibmar  
noar-imakdimalad: <sup>6</sup> Dule-binsaedsulidaedgala,  
aka arbaed-nuegan ukleged. Ar dule-bur-  
nabir-binsamaladgardina, arbaed-baisulid  
ega ukleged. <sup>7</sup> An daksabalid, dule-maiga-  
gudimaladi, moli-birgi-sii gudidamalad. Ar dule-  
nuga-nikamaladdina, maiga-gudiiyob nagab  
galitodidamalad.

- 8** Dule yaa-matusur-akwisdibe, sunna egi arg-waned.  
 Dule gagan-matusulid-eminaidibe, sunna dubgi warmaked.
- 9** Dule, akwa mamarye-sogdibe, sunna akwagi nailikgued.  
 Dule sapan mamarye-sogdibe, sunna e-dargagi makleged.
- 10** Ar akan e-nugar-berguddibe, e-nugar ebillesurbardibe, ibmar-sikegala, sabsur achiklegergebed.  
 Binsaed-nikaguedgi ibmar-imaklegedi, nuekwagwadgi-ibmar-imaklegedi, ibmar-nued amileged.
- 11** Ar naibe gar-ogoledba-ododoleged-iduar, dule-ega-gar-ogoledgi warmaksadibe, dule gwen egi bar mani amiosulid.
- 12** Dule-binsaed-ibed-e-sunmaked yeer itoledaed, dule-binsaedsulidaed-e-sunmakeddina, na dukin egi aibined.
- 13** Dule-binsaedsulidaed gebe sunmakdele, e-gaya-miedi, gwen nabir sunmaksulid.  
 Deyob gaya-nuedsuli e-sunmaked obeloddaed.
- 14** Degite, sunmaknaigusale, gayaburbamar suli-suli amisulid.

Dule neg-guoed gwen wissulid.

Yoedse ibmar-danibaloed gwen-wissurbalid.  
 Ar dule, we-ibmar, gwen wisguosulid.

- 15 Dule-binsaedsulidaed, arbaedgi baisursunna  
yegued.  
Neggweburse-naed-igarbela wissurbalid.
- 16 Rey amba nuchukwagwar, neggwebur, wiles-  
dakledaed.  
Degin, e-sapingan-dummaganmoga, unnila  
wakdaradba iba-onogedgi arbadidamalad,  
deyob osedoddamalad.
- 17 Neggwebur-e-rey dule-nuga-nikaddibe, we-  
neggweburgi ise-nued binsalesad.  
Degin, e-sapin-dummagandina, e-wachiba  
na mas-gunmalad,  
deyob na niga-ogannomaland.  
Mumguega ambikusurmalad.
- 18 Wiedba neg-uas-nudaklesulile, neg-uas ayarid-  
daed,  
degine, wiedgi-neg-soblesadbali, neg malud-  
daed.
- 19 Wergulegegala, masgulleged-iba onoleged,  
yeer-itolegegala, vino gobblebalid.  
We-ibmar-imakegala, mani abeleged.
- 20 Reygi mer be ichakwa sunmako,  
mer egi be ichakwa binsabalo.  
Deginbali, dule-mani-ibedgine, mer egi be arba-  
kee isdar sunmakbalo.  
Ar sikwimar-gudidiid sunna be-barsoged,  
ar sikwimarde sakan-nika nanaed,  
degisoggu, baisursunna gayamar berbeged.

# 11

*Binsaed-nikadgi-itoakwaa-ibmar-imakleged ib-nuedid*

- <sup>1</sup> Diaki be-madu be mete,  
yoedsega be gannar amioed.
- <sup>2</sup> Be-ibmar-nikad, dule-walaguglega (7) be uke,  
dule-walabaabakadse (8) ega be ukodibe.  
Ar yoedsega we-napneggi bonigan-  
gwisgunonikoed be wissulid.
- <sup>3</sup> Mogirmar gudure-naddibe,  
dii wiardaed.  
Sapi dad-nakwed-argan-sapiledsik ailaddibe,  
dad-nakwed-argan-nuedsik ailaddibe,  
ar agi megodo.
- <sup>4</sup> Dule unnila burwa-goledginbi atakdidibe,  
ibmar-gwag digosurguoed.  
Dule mogirmarginbi atakdidibe,  
ibmar-gwag weosurguoed.
- <sup>5</sup> Ar be wissulid, bia burwamar naddae. Be  
wissurbalid, igi mimmi sapidukugi-mege, degi,  
igi dungumaidabali. Degisoggu, ar bela Bab-  
Dummad-e-ibmar-imaked-bursunna, igi be wis-  
guosunna. Geg be wisgued.
- <sup>6</sup> Wakudaryala ibmar-gwag be digo, sedogid-  
bali, be baid digbalo. Ar be wissulid, biti bur bega  
nabir igarga gudoe, wakudaryala-diglesaddibe,  
sedo-diglesaddibe. Ar wisgulesulid, biti nabir  
igarga gudodibe. Ar ebobela sanmakdebalodibe.
- <sup>7</sup> Neg-meegwadi yeer emar-imaked. Dad-ibeler-  
gaedi weligwar emar-imaked. <sup>8</sup> Amba dule

undar seredi-megye-sogele, degine, e-ibagangi wergudigus-inigwele, ebinsao, ibagan-bulegan-bukidar itodii gubaloed. Deginbali, bela ibmar-danikoedi, gwen nabirsulid.

*Be-Bab-Dummad-be-obinnisad be ebinsao*

<sup>9</sup> Machi-sapin, sapingwa-guedgi gatik be werguo. Nuchukwagwadgi na be yeer-itodii imako. Be-gwage-itogedba na be ibmar imako, be-ibyagwar-neg-dakdiidba na be ibmar-imakbiedba imako. Degi-inigwele, be ebinsao, Bab-Dummad ar bela be ibmar-imaked, wilubdaknonikoed.

<sup>10</sup> Degisoggu, urwed be iego, ibmar-isgana-imaked be iebalo. Be ebinsao, ar sapinguandanikidgine, degi, sapingwagwadgine, amba aku neg-itoleded-ibaganad. Ar we-igar gwen-nabirsulid.

## 12

*Sered-ugakgusadgi egi-ibmar-guoed*

<sup>1</sup> Sapingwa-gudiidgi Bab-Dummad-be-obinnisad be ebinsao.

Ibagan-bulegan-danikoed-idu, Bab-Dummad be ebinsao.

Ar bиргамар-булан-ноникile, be sognonikoed:

“An-seredgussoggu, ibmar-nuegangi bar an wergudisurye.”

<sup>2</sup> Dad-ibeler-gaed bar be itogosulid-idaule,

Bab-Dummad-be-obinnisad be ebinsao.

Nii-gaed bar be daksuliguoad-idaule,

Bab-Dummad-be-obinnisad be ebinsao.

Niisgwamar-gaed bar be daksuliguoad-idaule,

Bab-Dummad-be-obinnisad be ebinsao.

Bega        dii-dummad-wisad-sorba,        gannar  
               mogirmar-nagunonikoedyob-guoed-  
               iduale,  
       Bab-Dummad-be-obinnisad be ebinsao.

<sup>3</sup> Ibagwengine, be-argan, neggi-nakulemaladyob-  
       gued wawanmakdoed,  
       be-mali,    bila-onomalad-dulemaryob-gued  
       nollomakdoed.

Be-nugarmar    ibmar-gwag-naged-akwamaryob-  
       gued,  
       ichegusadbali, bar ibmar bayogosulid.

Be-ibya,        yawagak-seniganaba-atakmaladyob-  
       gued,  
       bar atakosulid.

<sup>4</sup> Be-uaya, yawagak-neg-imbamaryob-gued, atu-  
       doed.  
       Bega        ibmar-gwag-naged-akwamar-goled,  
       boggumai gudoed.

Bega sikwimar-namaked bergudoed,  
       bela namakmalad bar be itogosulid.

<sup>5</sup> Neg-matusulidgi-nanalegedgi be dobe itonon-  
       ikoed,  
       igarba-bonisar-nanalegedgi dobe be itononi-  
       baloed.

Be-sailagia,        ibmar-durba-sibudiksiyyob  
       osibumakdoed.  
       Ses-nanaeyob arbaed-dummad be nanadii  
       guoed.

Ibmar-gullegedi, bar bega nued-gulle gunoniko-  
       sulid.  
       Ar ade,    dule degisadegu-yoggued-negse  
       nadapid,  
       bar gannar dagegarsulid.

Bega-dule-bomaladdi, galimba-ebiris obirya-makdoed.

- <sup>6</sup> Mani-dub-itired-idu, or-nog-mared-idu,  
Bab-Dummad-be-obinnisad be ebinsao.  
Dii-weenaidgi mete-mared-idu, dii-weed-  
bipirmaknaid-bibisged-idu,  
Bab-Dummad-be-obinnisad be ebinsao.
- <sup>7</sup> Ar napagi be danisoggu, napaga be gannar bin-  
nidoed.  
Be-burbadi gannar Bab-Dummadse naoed.  
Ar Bab-Dummad bega burba-uksadid.

- <sup>8</sup> Odurdaked-saila weyob soged:  
“We-napneggi-ibmar-imaklegedi, binsar-  
sunna imakleged,  
bela igarga gwen gusulid.”

### **3. SUNMAKLESAD-E-BURBA (12:9-14)**

<sup>9</sup> Odurdaked-saila, binsaed-ibedbar-inigwele,  
dulemar-odurdakdii gusbalid. Bela nue-  
ibmar-balaminai gualid, sogedba balaminai  
gusad. Deginbali, binsaed-nuegan-narmaksad  
bukidar ilemaknai gusbalid. <sup>10</sup> Odurdaked-  
saila gayaburba-nuegan ise-amiar imaksagusad.  
Dagine, gayaburba-nuegan innikigwadba  
narmaksa gusad.

<sup>11</sup> Dule-binsaed-ibegan-e-sunmakedi, gammi  
ur-semaidaebayobi, emar-nied. E-binsaed-  
nuegan-onmaksadi, buarmar-neg-ganikidyob  
gued. We-binsaed-nuegan, Bab-Dummadgi  
danikid. <sup>12</sup> Machi, egi be binsabaliga napi

an bega sogbargwelo: Gardamar-bukidar-narmakleged berguosulid, degine, gardamar-doggus-durdaklegedi, dulega geg-gued uked.

<sup>13</sup> We-ibmar-sunmaklesad, wese bergenon-isunnad: Unnila be Bab-Dummad-dobekwaa-gudii nanao, e-Igarmar-Mamaidba be ibsao. Ar dulega, we-ibmarbi unnila ibnuedga gued. <sup>14</sup> Ar ibmar-nued-imaklesadi, ibmar-isgana-imaklesadi, Bab-Dummad bela wilubdaknonikoed. Amba ibmar dukuar-imaklesdibe, bela wilubdakbaloed.

**Bab-Dummad-Garda-Islidikid  
The Holy Bible in the San Blas Kuna language of  
Panama  
La Santa Biblia en el lenguaje de San Blas Kuna de  
Panamá**

copyright © 2014 Wycliffe Bible Translators, Inc.

Language: San Blas Cuna (San Blas Kuna)

Translation by: Wycliffe Bible Translators, Inc.

**Copyright Information**

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Kuna, San Blas

**© 2014, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-03-31

---

PDF generated using Haiola and XeLaTeX on 11 Nov 2022 from source files  
dated 29 Jan 2022

eb5c3a84-7a8b-5f2f-8344-21a6af7506b8